

Perdana Menteri enggan ulas pertemuan

KUALALUMPUR: Datuk Seri Abdullah Ahmad Badawi memilih berdiam berhubung pertemuan empat mata dengan bekas Perdana Menteri, Tun Dr Mahathir Mohamad di Seri Perdana, Putrajaya, Ahad lalu.

"Tolong, bukan subjek itu. Lain kali sajalah", itulah jawapan penuh sopan daripada Abdullah pada Majlis Rumah Terbuka Aidilfitri Perdana Menteri dan Jemaah Menteri di Pusat Dagangan Dunia Putra di sini, kelmarin.

Bagaimanapun pemberita terus mendesak beliau mengulas pertemuan itu, tetapi Abdullah yang nampak riang selepas menyambut beribu-ribu tetamu di rumah terbukanya, sekali lagi merayu: "Tidak... Saya tidak akan menyentuh perkara itu... ada masa sesuai nanti".

Perdana Menteri sebaliknya berkata, bilangan kehadiran besar di rumah terbuka hari ini iaitu hampir 200,000 orang menunjukkan rakyat masih mempunyai keyakinan terhadapnya.

"Saya percaya mereka yang datang gembira. Ada yang memberitahu saya supaya meneruskan pencapaian baik itu. Kami akan terus menyokong anda. Orang ramai memberi saya keyakinan...saya suka bertemu mereka," katanya.

Malah selepas mengunjungi Presiden Barisan Kemajuan India Malaysia (IPF), Datuk M G Pandithan di Hospital Kuala Lumpur (HKL) semalam, Abdullah turut tidak menyentuh pertemuan itu.